



La squadra ch’ha organisau l’emprema buorsa d’artechels d’affons a Laax: Seraina Cathomen, Simona Camathias, Ramona Walser, Rita Arpagaus e Milena Matter (da sen.).



Massa vestgadira d’affons per la stagiun d’unviern ha midau maun alla buorsa.

FOTOS A. BEELI

Melli battegls e termagls

Viseta all’emprema buorsa d’artechels d’affons a Laax

■ (anr/abc) Massa geniturs cun affons pigns e mesauns han ins entupau sonda avonmiezgi ell’aula dalla casa da scola a Laax. L’uniun da dunnas ha organisau per l’emprema gada ina buorsa d’artechels d’affons. «Bein, nus essan fetg cuntenzas cuagl interess», concluda la presidenta dall’Uniun da dunnas da Laax, *Seraina Cathomen*. Sonda vargada ha quell’uniun organisau per l’emprema gada a Laax ina buorsa d’artechels d’affons. Vendergis sera havevan las mummass saviu purtar il resti ed ils artechels ch’ellas han vuliu dar vinavon. Mintga singul artechel

ha denton stuii ademplir certas normas da qualitat. La suprastonza haveva confidau a *Milena Matter*, commembra dall’uniun, il tgamun da quell’occurrenza. Gia dapi in temps havevien ins giu endamen ch’ei fussi d’organisar ina tala occurrenza a Laax, ha la presidenta Cathomen raquintau. Cun Matter han ellas anflau ina dunna ch’enconuscheva igl andament e proceder. Duront treis meins ha il comite d’organisaziun preparau la buorsa d’artechels d’affons. Igl emprend han ins stuii fixar in feigl cullas cundiziuns. Lu scriver ora e publicar baul

avunda l’occurrenza. Ils geniturs ch’han vuliu dar vinavon resti ed artechels han stuii s’annunziar. Els han stuii risguardar las normas da qualitat, etichettar tut e fixar sezs ils prezis. En tut ein 35 geniturs respectiv mummass s’annunziar. Il vendergis sera ha il comite priu encunter la rauba e registrau mintga battegl. Otg dunnas ch’ein semessas a disposiziun sco gidontras han cavigliau e presentau la rauba sin 50 measas tenor grondezia e gener. Era massa giugs e termagls, schizun battegl pli gronds sco maxi-cosys per pops pigns, skis, cundrezs da far

schetg ed auter han midau maun duront la buorsa. «Massa buna rauba havein nus retschiert», ha Matter constatau. L’actua-ra dall’uniun e conorganisatura, *Simona Camathias*, puntuescha che l’uniun da dunnas hagi buca vuliu far fatschenta culla marscha da 20 pertschient ch’ella ha teniu anavos. Dils rodund 500 artechels ch’han midau maun sa l’Uniun da dunnas da Laax surdar ina biala summa all’organisaziun KiPaKi. Igl ei in’ovra caritativa dils club da servis Kiwanis Grischun e Part sura da Sogn Gagl. *Serafin Beer*, Bogn Ragaz/Tavanasa, presidescha

quell’organisaziun enteifer il club. Intent da KiPaKi eis ei da porscher sustegn ad affons malsauns e basignus ella regiun. *Lydia Tschuur* dil club Surselva fa part dalla suprastonza ed ei responsabla per la comunicaziun. Sco quei che la presidenta dall’Uniun da dunnas da Laax ha confirmau ein vestgadira ed artechels per la stagiun d’unviern stai el center dalla buorsa. Cathomen renda attent ch’ei detti primavera 2020 puspei ina tal’occurrenza cun accent sin vestgadira ed artechels per la stagiun caulda.

■ PCD LUMNEZIA

In onn da success per la pcd Lumnezia

(mc) Alla radunonza generala dalla pcd Lumnezia ch’ha giu liug venderdis vargau a Val S. Pieder ha il niev parsura Gian Derungs (Lumbrein) saviu trer ina bilanza ordvart positiva. Cun gronda satisfaziun ha la pcd Lumnezia priu enconuschientscha dil fatg che siu commember *Marcus Caduff* (Morissen) ei vegnius eligius honorificamein ella regenza grischuna. S’entelli ch’il niev cusseglier guvernativ ei vegnius retscharts e festivaus commensuradamein en Lumnezia ed a Morissen cul motto «Nus essan regenza». Suentar Gieri Antoni Vieli (Cumbel/Razén), Gion Barclamiu Arpagaus (Cumbel), Johann Schmid (Val/Cuera), Gion Bistgaun Capaul (Lumbrein), Giachen Giusep Casaulta (Lumbrein/Cuera) ei Marcus Caduff (Morissen) il sisavel Lumnezian ch’ha quella cuida. Era las elecziuns circuitalas ein stadas per la pcd Lumnezia in success cumplein. Sco novs deputai el cussegl grond ein *Gian Derungs* (Lumbrein) e *Stefan*

Schmid (Val) vegni eligi. *Curdin Capeder* (Cumbel) resta suppleant da deputau. Alla radunonza annuala a Val ein ils delegai dalla Lumnezia ella pcd cantunala vegni tsharni resp. confirmai. Quei ein: *Othmar Berni*, *Daniel Blumenthal*, *Martin Cabalzar*, *Marcus Caduff*, *Gian Andri Derungs*, *Stefan Schmid* e *Thomas Schmid* (tuts ex officio), plinavon *Rudolf Caduff*, *Robert Caminada*, *Ciril Collenberg*, *Curdin Capeder* (niev), *Erhard Berni* (niev), *Arno Gartmann* (niev), *Markus Jörger* (niev), *Sarina Caduff* vegn a representar da niev las dunnas dalla pcd Lumnezia. Sco suppleants vegnan confirmai: *Rest Martin Caduff*, *Curdin Casaulta*, *Anton Derungs* e *Moritz Schmid*. Zun gartegiadas ed ordvart bein frequentadas ein era las seradas tematicas davart l’agricultura a Degen cun *Marcus Caduff*, *Markus Ritter*, *Thomas Roffler* e *Curdin Capeder* e davart la forza hidraulica a Val S. Pieder cun *Stefan Engler*, *Clemens Hasler* e *Not Carl* stadas. Era il stan dalla

pcd al Marcau Daniev lumnezian a Degen ha cattau gronda accoglientscha Il niev cassier *Curdin Capeder* ha presentau in quen cun in deficit da rodund 4800 francs ch’ei d’attribuir cunzun allas contribuziuns alla partida cantunala ed allas expensas electorales. Nuotatonmeins vegn la taxa da commembradi annuala mantenida a 30 francs. Sut varia recamonda il parsura dalla pcd Surselva e schef da propaganda *Kevin Brunold* da sustener serradamein la reelecziun da cusseglier dils stans *Stefan Engler* e cusseglier naziunal *Martin Candinas* cun metter en l’urna la gliesta principala ni ina dallas duas gliestas dalla pcd giuvna. Dalla Surselva figureschan sin quellas gliestas sper Martin Candinas (Rabius) Kevin Brunold (Surcuolm), Sarina Caduff (Cumbel), *Anton Capaul* (Lumbrein), *Fabian Collenberg* (Cumpadials) e *Carmelia Maissen* (Castrisch). La pcd seigi la partida dil federalissem, digl equilibrer e dalla solidaritad.

■ MUSICA

L’entira biennala vegn emessa

(anr/abc) Mesjamna proxima, ils 2 d’october han ins caschun da tedlar igl entir concert dalla Biennala 2019 sigl emittur da radio DRS2. Ei setracta dil festival cul tetel «Biennale – ein Fest der neuen Musik für Graubünden» ch’ei staus ils 7 d’avrel 2019 el Teater dil marcau a Cuera. Igl ei stau in concert en connex culla retscha «Tuns contemporans». *Philippe Bach* ha dirigiu la Kammerphilharmonie dil Grischun. In grond auditori ha giu caschun da tedlar in program cun ovras dalla musica classica contemporanea. La registraziun digl entir concert san ins tedlar mesjamna sera naven dallas 21.00. Il program includa treis premaudiziuns. Da *Fortunat Frölich* ei d’udir l’ovra «Der Klang der Stille», da *David Sontòn Caflisch* «Enceladus» per ensemble ed orchester e da *Dieter Ammann* «Unbalanced Instability» per violina ed orchester. *Simone Zgraggen* ei stada solista, igl ensemble ö! ha cooperau. Vinavon ha la Filharmonia da com-

bra dil Grischun sunau la sinfonia nr. 4, op. 132 da Gion Antoni Derungs. Era quella san ins tedlar mesjamna allas 21.00 sigl emittur DRS2. Igl onn 2021 dat ei la proxima gada ina biennala cun musica contemporanea.

Essas Vus gia commember?

Procap Grischun
Hartbertstrasse 10, 7000 Cuira
Tel. 081 253 07 07, PC 70-7755-0
www.procapgrischun.ch

procap grischun

per persunas
cun handicap

reclama

FDP

Die Liberalen

Wollen. Wählen.

Möglich machen.

Gemeinsam weiterkommen.

Arbeitsplätze und Wohlstand

Zugang zu weltweiten Märkten

Liberele Umweltpolitik